

[Handwritten signature]


JAMHUURIYADA SOMALILAND

GOLAH WAKIILLADA

Xeerka Mamnuucidda Miinadda Lidka Dadka



XEER .NO.40/2009

REPUBLIC OF



SOMALILAND

THE PRESIDENT

REF. JSL/M/DECM/249-1530/052009

DATE 26/05/09

DECREE TO MADAXWEYNE NO: 382 /052009

Madaxweynaha Jamhuuriyadda Somaliland

- Markuu Arkay: Qodobka 90aad ee Dastuurka Jamhuuriyadda Somaliland.
- Markuu Arkay: Qodobka 75aad ee Dastuurka Jamhuuriyadda Somaliland.
- Markuu Helay: Go'aanka GW, Go'aan NO: 440 ee ku suntan GW/KF-8/440/2009 ee 17/01/2009 iyo Go'aan GG, Go'aan NO: 04/kal-fadhiga 37aad/03/09 ee 03/03/2009 kaasi oo ay ku ansixiyeen Xeerka Mamnuucidda Miinadda Lidka dadka ee Xeer Lambar 40/2009.

Wuxuu Soo Saaray

Xeerkan oo lagu baahinayo dhaqan-galka Xeerka Mamnuucida Miinada Lidka Dadka ee Xeer Lr. 40/2009.

Allaa Mahad Leh


Daahir Rayaale Kaahin
Madaxweynaha JSL





Ref: GW/KF-8/440/2009

Date: 17/01/2

Ujeedo: - Go'aanka Ansixinta Xeerka Mamnuucida Miinada Lidka
Dadka (Xeer LR.40/2009)

GOLAHA WAKIILADA JSL

MARKUU ARKAY:

Qodobka 38aad, faqradda 4aad xarafyada B&T & Qodobada 39aad, 18aad ee Dastuurka Jamhuuriyada Somaliland.

MARKUU DERSAY:

Axdiga Caalamiga ah ee mamnuucida, isticmaalka, kaydiga, soo saarida iyo gudbinta miinada lidka dadka.

MARKUU TIXGELIYEEY:

Ahmiyada way nee ay leedahay in la helo xeer lagaga hortago waxyeellada miinada iyo walxaha kale ee qarxa.

MARKUU KU QANCAY:

In nuxurka xeerkani xambaarsan yahay ilaalinta xuquuqda muwaadiniinta iyo inuu kala qeexayo sidii loo kala sooci lahaa doorarka Hay'adaha ka shaqeeya miinada iyo waxyeeladeeda.

MARKUU U CODEEYEEY:

Fadhigiisii 17/01/2009 oo ay goob joog ahaayeen (43) Mudane oo ka mid ah Mudanayaasha Golaha Wakiilada

WUXUU

Cod aqlabiyad ah (34 cod) oo gacan taag ah ku Ansixiyay Xeerka Mamnuucida miinada Lidka Dadka Xeer LR.40/2009, halka ay ka diideen (3) Mudane, kana aamuseen (5) Mudane, Gudoomiyuhuna muu codayn sida caadada ah.

ALLAA MAHADLEH

Maxamed Xassan Kaahin (Keyse)
Xog. Guud ee Golaha Wakiilada



Maxamed C/laahi (Ciro)
Gudoomiyaha Golaha Wakiilada JSL



Golaha Wakiilladu:

- Markuu arkay :** Qodobada,38aad, 39aad, 17aad iyo 18aad Faqradiisa 2aad Ee Dastuurka Jamhuuriyadda Somaliland.
- Markuu dersay :** Axdiga Caalamiga ah ee mamnuucidda, isticmaalka, kaydsga, soo saaridda iyo gudbinta Miinada lidka dadka(Axdiga Ottawa).
- Markuu Arkay :** Go'aankii tirsigiisu ahaa GW/KF-7/89/99 ee 01/03/1999, kaas oo uu goluhu ku taageeray Axdiga Ottawa ee mamnuucidda isticmaalka, kaydsga, soo saaridda iyo gudbinta Miinada lidka dadka.
- Markuu qaderiyey :** Ahmiyada weyn ee ay leedahay in la helo xeer lagaga hortago Waxyeellada Miinada iyo walxaha kale ee qarxa.
- Marku ku qancay :** In nuxurka xeerkani xambaarsan yahay ilaalinta xuquuqda nafeed, jidheed iyo maskaxeed ee muwaadiniinta JSL

WUXUU SOO SAARAY XEERKAN :



QAYBTA 1AAD

HORDHAC

QODOBO GUUD

Qoddobka 1aad

Micnaha Erray-bixinta

- **Aaladda lidka addeegsiga:** Waxaa loola jeedaa aalad loogu talagalay in miinada lagu xafido oo ah qayb ka mid ah, ku dhegan ama miinada kaga xidhan xagga hoose, taas oo dhaqaajisa miinada marka cidi isku daydo in ay si lama filaan ah u farafarayso ama si kas ah ugu ciyaarto.
- **Miinada lidka dadka:** Waxaa loola jeedaa miinada si buuxda ugu qaraxda taabasho, ku joogsasho ama daaris oo ay ku jiraan walxaha kale ee dhagrigidda, carinta qaraxyada iyo miinada lidka gaadiidka ee saamayntaa oo kale leh, ha ku xidhnaato ama yaanay ku xidhnaan aaladda lidka addeegsiga, sidoo kale, qaybo ka mid ah miinada lidka dadka oo loo farsameeyay, loo bedelay ama laga dhigay hub u qarxa sida miinada lidka dadka ama miinada lidka gaadiidka ee ku qaraxda cadaadiska ama culayska dadka, waxa loo aqoonsan yahay miinada lidka dadka.
- **Miino:** Waxaa loola jeedaa walax qaraxda oo loogu talagalay in la dhigo dhulka hoostiisa ama meel korkiisa u dhaw ama meel kale oo bannaan, si ay ugu qaraxdo taabasho, cadaadis, ku joogsi, u dhowaansho, kulayl dad, xayawaan, gaadiid iwm.oo keenaya qarax kala firdhid waxyeelo jidheed ama nafeed sababi karo, loona adeegsado ujeeddo milateri.
- **Goob miinaysan:** Waxaa loo la jeedaa dhul halis u ah miino ku jirta ama loo tuhunsan yahay.
- **Axdiga:** Waxaa loo la jeedaa Axdiga (Convention) caalamiga ah ee mamnuucidda, isticmaalka, kaydsga, Soo Saarida iyo Gudbinta Miinadda lidka dadka ee **18kii September 1997**.
- **Xafiiska:** waxaa loola jeedaa Xafiiska M/weyne ku-xigeenku ee hawlaha miinada una igman masuuliyadda xeerkan.
- **Wareejin:** waxaa loola jeeda in miinada laga qaado dhulka JSL laguna wareejiyo cid ilaalinteeda iyo haynteeda u xilsaaran oo aanay ku jirin dhulka miinadu ku duugan tahay.



Qoddbka 2aad
Magaca Xeerka

Xeerkan Waxaa loogu yeedhayaa Xeerka mamnuucidda istimaalka, kaydsiga, soo saarida iyo Gudbinta Miinooyinka lidka Dadka iyo burburintooda.

Qoddobka 3aad
Fasiraad

Xeerkan waxaa loo fasirayaa si waafaqsan Shareecada Islaamka, Xeerarka kale ee Dalka, iyo Xeerarka Caalamiga ah .

Qoddobka 4aad
Xadka Adeegsiga Xeerka

1. Xeerkan waxaa loo adeegsanayaa qof kasta oo u dhashay somaliland, oo jooga dalka dibeddiisa ama gudihiisa .
2. Qofka kasta oo ajenabi ah oo dalka ku jooga si sharci ah.
3. Dhammaan shirkadaha iyo haya'daha ajenabiga ah ee ka shaqeyda dalka gudihiisa, kana diiwaangashan.

QAYBTA 2AAD
MAMNUUCID IYO DEMBIYO

Qoddobka 5aad
Hab-dhaqanka Reebsan

1. Marka laga reebo tilmaamaha qoddobka 8aad ee xeerkan waxaa reebban in qofna:
 - a) Adeegsado Miinada lidka dadka
 - b) Curiyo, sameeyo, soo saaro ama farsameeyo miinada lidka dadka
 - c) Helo miinada lidka dadka
 - d) Haysto, lahaado, xafido ama kaydsado miinada lidka dadka



kh) Iibiyo, soo iibsado, ka ganacsado, bixiyo, qaado, ama u wareejiyo cid kale si toos ah ama dadban miinada lidka dadka.

2. Marka laga reebo tilmaamaha qoddobka 8aad ee xeerkan, waxaa reebban in qof ku caawiyo, ku dhiirigeliyo ama ku booriyo qof kale, inuu si uun ugu kaco falalka lagu reebay faqrada 1aad ee qoddobkan.

Qoddobka 6aad

Dembiyo iyo Ciqaabo

1. Haddii aan xeerka ciqaabta guud ama xeer kale oo ciqaabeed si ka duwan u nidaamin, qof kasta oo ku kaca falalka ku xusan faqrada qoddobka 5aad ee xeerkan waxaa lagu ciqaabayaa:
 - b) Haddii falalkaas uu galay qof ama tiro dad ah, waxaa lagu ciqaabayaa xadhig u dhexeeya hal (1) sanno ilaa saddex (3) sanno ama ganaax u dhexeeya hal milyan ilaa laba milyan shilin (1,000,000 - 2,000,000 Sh.Sl.).
 - t) Haddii falalkaas mid ka mid ah uu ku kacay urur, hay'ad ama maamul kale oo shaqsiyad qaanuuneed leh, waxaa lagu ciqaabayaa ganaax u dhexeeya shan milyan ilaa toban milyan shilin (5,000,000 -10,000,000 Sh.Sl.).
2. Marka falalka ku xusan faqrada qoddobka 5aad, qofku ku galay ogaanshaha ama oggolaanshaha maamulka uu ka tirsan yahay ama masuulka ka yahay, ama ku dhaco falku taxadar-daro ama dhayalsi, masuulka maamulka, ciqaabta ku xusan faqrada 1aad, xubinta(b) ee qoddobkan, waxaa wada mutaysanaya maamulka iyo qofka falka ku kacay, waa marka falka lagu galay xarumaha ama dhismayaasha ama gaadiidka ama qalab kale ama goob kale oo hoos timaada awoodda maamulkaas.
3. Haddii aan xeerka ciqaabta guud ama xeer ciqaabeed oo kale si ka duwan u nidaamin, qof kasta oo ku caawiya, ku dhiirigeliya ama ku booriya ama si uun ugu fududeeyo qof kale in uu galo falalka ku xusan faqrada qoddobka 5aad, wuxuu mudanayaa ciqaabta ku xusan faqrada 1aad, xubinta (t) ee qoddobkan .
4. Haddii aanu xeerku si ka duwan u sheegin, qof kasta oo ka mid ah kuwa ku xusan qoddobka 8aad ee xeerkan oo si aan sharciga waafaqsanayn ugu dhiiba, ugu wareejiya, uga iibiya qof kale si uu u adeegsado, uga ganacsado, u wareejiyo, u lahaado, u kaydsado miinada lidka dadka ama u dayaca si ay gacanta ugu geli karto qof ku galo falalka ku xusan qoddobka 5aad, wuxuu mudanayaa ciqaabta ku xusan faqrada 1aad, xubinta (b) ee qoddobkan.
5. Xukun kasta oo ku saabsan dembiyada xeerkan, waxaa wehelinaya ku wareejiinta miinada marag muujinta dembiga ah xafiiska qaranka ugu xilsaaran miinada si loo burburiyo.



Qoddobka 7aad

Addeegsiga xuduudaha dalka ka baxsan

1. Hab dhaqanka ku xusan Qoddobka 5aad, waxa lagu dhaqayaa fal-dembiyeedka ka dhaca dibedda xuduud dhul jamhuuriyadda somaliland ee ay gaystaan, cid(Qof, xafiis, Urur,Hay'adda, shirkadda iwm.) oo degan Jamhuuriyadda somaliland.

Qoddobka 8aad

Cigaab ka Reebbid

1. Tilmaamaha qoddobada 5aad iyo 6aad laguma dhaqayo xubin/xubno ka tirsan ciidanka millateriga, Booliska, Garsoorka ama hay'adaha wax-ka-qabadka miinada u xilsaaran ama qof(cid) kale oo Xafiisku qoraal ugu xilsaaray muddada ay socota Hawl ay ujeeddadeedu tahay:
 - b)Baadhis fal dembiyeed miinada la xidhiidha
 - t) In uu miinada lidka dadka ka dhigo mid aan waxyeello keeni karin
 - j) Inuu u xafido si mustaqbalka loo burburiyo
 - x) In uu u qaado miinada xafiis ama xarun lagu burburiyo ama lagu kaydiyo
 - kh) In uu u fuliyo hay'adaha ama maamulada ama dadka ku xusan faqradan ee qodobka hawshooda sharcigu u xilsaaray.
2. Waxaa kale oo tilmaamaha qodobada 5aad iyo 6aad ku xusan ka reebban, qof kasta ama maamul kasta,(**sida Ciidamada qalabka sida**) oo xafiisku si sharci ah ugu ogalaaday in uu miinada u adeegsado sababo la xidhiidha :
 - Cilmi baadhis
 - amaWaxbarasho
3. Wasaaradda Gaashaandhiga iyo hay'adaha kale ee hawlaha miinadda ka shaqeeya waxay soo codsanaysaa xaddiga miinadda ee faqradda 2aad ku xusan, waxaana u oggolaanaya xafiiska hawlaha miinadda Qaranka isla markaana xafiiska codsiga ay soo gudbisato Wasaaradda Gaashaandhiga iyo hay'adaha kale hawlaha miinaddu sidiisa ayuu ku oggolaan karaa,wax buu ka bedeli karaa,wuuna diidi karaa.



QAYBTA 3AAD

WAX-KA QABASHADA MIINADA

Qoddobka 9aad

Soo sheegista Miinada lidka dadka

1. Qof kasta oo ogaada miino loo haysto sifo ka baxsan sifaha qoddobka 8aad uu dhigayo, waa in uu si degdeg ugu war geeyaa ama u ogeysiiyaa ciidanka booliska Somaliland, ciidamada qalabka ama hay'adaha wax ka qabashada miinada u xilsaaran si ay tabaabushe ugu sameeyaan soo qaadisteeda iyo burburinteeda.
2. Ciidamadda iyo hay'adaha kale ee u xilsaaran miinaddu way geli karaan meelaha looga shakiyo ama lagu ogaado inay yaalaan, miinadda ama walxaha kale ee qarxa si ay ula wareegaan una burburiyaan.
3. Ciidamadda ama cidada kale ee ku xusan faqrada 2aad ee qoddobkan waa in ay sitaan oggolaansho(warrant), sharciyeysan.
4. Haddii ay ugu muuqato ciidamada ama Hay'adaha miinnada u xilsaaran inuu oggolaanshuhu (Warrant) fashilinayo qabashada ama ogaanshaha miinadda ama walxaha kale ee qarxa way geli karaan, oggolaansho la'aan, meelaha lagu tuhmayo, in ay miinaddu taallo.

Qoddobka 10aad

Burburinta miinada lidka dadka

1. Xafiisku wuxuu xaqiijinayaa burburinta:
 - B) Dhammaan kaydka miinada lidka dadka ee ay mulkigeeda leedahay ama haysato jamhuuriyadda Somaliland ama xudduudkeeda dhul ku jira ama ay amarkeeda leedahay muddo aan ka badnayn (4) sanno ka dib dhaqan-galka xeerka.
 - T) Dhammaan miinada lidka dadka ee ku jira goobaha miinaysan ee xuduudda dhul ee Jamhuuriyadda Somaliland gudaheeda ku yaala waqtiga ugu dhaqsaha badan ee suurtagal ah oo aan ka badanayn muddo (10) sanno ka dib dhaqangalka xeerkan.
 - J) Dhammaan miinada lidka dadka ee lagu soo war-geliyo ama loogu keeno inay burburiso.
2. Miinada marka la soo saaro ama la soo qabto, waa in lala socodsiiyaa xafiiska dhexe ee miinada, kaas oo marka la diiwaangeliyo lana hubiyo oggolaanaya in la burburiyo.
3. Burburinta miinada waxaa goob-joog ka noqonaya sarkaal ka tirsan ama ka wakiil ah **xafiiska** dhexe ee miinada oo aqoon u leh arrimaha miinada.
4. Miinada waa in lagu burburiyaa goob ku haboon, oo la hubiyay in aanay dadka iyo deegaanka midna dhibaato uga imanayn.



Qoddobka 11aad

Calaamadinta, hilaadinta iyo xafidaada Miinada

1. Dhammaan goobaha miinaysan ama lagu tuhunsan inay miino ku jirto, waa in sida ugu dhaqsaha badan loo calaamadiyo loona xayndaabo ama dayro, haddii kale waa in loo addeegsadaa hab kale oo suuragal ah, si ay dadka rayidka ahi uga war-helaan in meesha miino lidka dadku ku jirto, lana ilaaliyo inta laga safaynayo ee la burburinayo dhammaan miinada lidka dad ee goobta ku jirta.
2. Calaamaduhu ugu yaraan waa inay wafaqsanaadaan **Xeerka Nidaamiyaha (protocol)** kabka Axdiga mamnuucidda iyo xaddidaadda addeegsiga miinooyinka iyo aaladdaha kale ee isbedelka lagu sameeyey 3dii may 1996kii ee lifaaqa u ah Axdiga qaybtiisa mamnuucidda iyo xaddidaada addeegsiga noocyo cayiman oo hubka ciidamada ah oo keeni kara dhaawacyo halis ah, yeelana kara waxyeello baahsan oo cid walba gaadha.
3. Waa in la sahamiyaa, goob kasta oo miino ku duugan tahay iyo goob kasta oo miino looga shakisan yahay, iyadoo sahanku noqonayo mid sugan oo si guud oo furan ay u heli karaa cid kasta oo hawlo miino ku saabsan fulinaysa.
4. Miino kasta oo la calaamadiyo ama la soo saaro waa in goob ahaan ama miino ahaan loo xafidaa, loona diiwaangeliyaa

Qoddobka 12aad

Kaalmaynta Dhibbanaha Iyo Wacyigelinta Halista Miinada

1. Xafiisku waa inuu qaadaa tallaabo kasta oo suurto gal ah sidii uu ugu fidin lahaa daryeel caafimaad, dib-u-dejinta iyo bulsho dib ugu celin dhibanayaasha miinadu waxyeellaysay.
2. Xafiisku waa in uu mar kasta ka wacyigeliyaa dadka rayidka ah sidii ay ugu noolaadaan degaannada miinadu ku jirto iyo sidii ay uga digtoonadaan khataraha kaga soo fool yeelan karta miinada iyaga iyo xoolahooda, si ku wajahan qorshaha iyo siyaasaadaha qaran ee miinada.
3. Xafiisku waa in uu baadhaa shilalka waxyeelada gaystay ee miinada, sababaha ay ku dhaceen, haddii cidi masuuliyadeeda leedahay waa in uu si xeerkan waafaqsan, dhibbanaha ugu raadiyaa daryeel caafimaad iyo cawil -celin ama mag-dhaw ku haboon oo Shareecada Islaamka waafaqsan.
4. Xafiisku wuxuu hubinayaa inay hawl-waddeenada wadaniga ah ee ka hawgala hay'adaha miinada ee ku waxyeeloobay hawl miino ka helaan hay'adahooda daryeelka caafimaad, mag-dhaw iyo dib u dhaqangelin xaaladooda ku habboon.



QAYBTA 4AAD

LA SOCOD IYO DABAGAL

Qoddobka 13aad

La socodka wadaniga ah

Xafiisku wuxuu la soconayaa dhaqan-gelinta Xeerkan iyo axdiga lagu dhaqangeliyay, isagoo kormeer sugan ku samaynaya hawl kasta oo hoos timaada.

Qoddobka 14aad

Guddiyo Xaqiiqo-raadin

1. Guddiyada xaqiiqo-raadiska ah ee caalamiga ahi dalka way iman karaan, waxaase waajib ah inay marka hore xafiiska ka helaan ogolaansho si ay hawl-gallo xaqiiqo raadis ah ka fuliyaan dhulka J/Somaliland, una hubiyaan in ku dhaqanka Xeerkan sidiisa u fulay.
2. Xafiisku waa inuu u fududeeyaa guddiyaddaa xaqiiqo-raadiska ah, hawlahooda isaga oo tallaabooyinka qaadaya
 - o Tallaabooyinka loo baahan yahay ka qaadaya soo dhoweynta, gaadiidka iyo Hoyataanka xubnaha guddida
 - o Xaqiijinaya nabad-gelyadda guddida ilaa xadka ugu sarreeya ee suurto-gal ah muddada ay joogayaan dalka.
 - o Bixinaya oggolaanshaha guddida loo siiyo inay keensadaan qalabka ay uga baahdaan macluumaad urursiga.
 - o U fududaynaya guddiyada xaqiiqo-raadiska ah in ay la kulmaan dadka ay u arkaan la kulankooda in ay macluumaad hawshooda la xidhiidha ka helayaan ama u booqdaan goob kasta oo macluumaad kaga xidhan yahay.
3. Marka ay S/Land dhaqan geliso Axdigan, markaa farqaddaha ku saabsan dhismaha wufuudda xaqiiqo raadinta caalamiga ah ee ku xusan qoddobka 8aad ee Axdigu way laasimayaan.
4. Guddiyada xaqiiqo raadiska ah uma bannaana inay ku xad gudbaan madaxbannanida J/Somaliland.

Qoddobka 15aad

Warbiximaha Xafiiska Dhexe ee miinada

Xafiisku wuxuu uga war-bixinayaa Baarlamaanka sannadkiiba hal mar geeddi-socodka lagu dhaqan-gelinayo xeerkan iyo xaaladda guud ee hawlaha miinada dalka, taas oo xambaarsan xogo faahfaahsan oo ku saabsan:



1. Tirada guud ee dhammaan miinada lidka dadka ee dalka ku jirta, miinada la soo saaray, miinada la burburiyay, miinada la kaydiyey ee ay mulkiday Jamhuriyadda Somaliland, goobaha miinaysan, sida wax looga qabtay, khasaaraha ay gaysatay iyo macluumaad kasta oo kale oo la xidhiidha miinada.
2. Ilaa xadka ay suurtagasho, jiiddaha ay ku yaaliin dhammaan goobaha miinaysan ee la hubo ama loo tuhunsan yahay inay ku aasan tahay miinada lidka dadka ee geyiga J.S.L, oo ku jiraan tirada nooc kasta oo miino lidka dadka ah ee ku aasan goob kasta oo miinaysan iyo xilligii la dhigay iyo qorshaha soo saaristeeda.
3. Xaaladda barnaamijyada u degsan burburinta miinada lidka dadka oo waafaqsan xeerkan iyo Axdiga caalamiga ah, oo ay ku jiraan faahfaahinta nidaamyada loo addeegsan doono burburintooda, meelaha ay ku kala yaaliin goobaha lagu burburinayo iyo Xeerarka nabad-gelayada dad iyo deegaan ee ay tahay in lagu dhaqmo.
4. Noocyada iyo tirooyinka dhammaan miinada lidka dadka ee la burburiyey kadib, dhaqan-galka Xeerka, oo ay ku jiraan faahfaahinta tirooyinka nooc kasta oo miinada lidka dadka ah ee la burburiyey, sida waafaqsan xeerkan.
5. Sifooyinka farsamo ee nooc kasta oo miinada lidka dadka ah ee markaa gacanta ugu jirta ama ay leedahay mulkigooda jamhuuriyada Somaliland iyo noocyadda xogahaas oo fududayn kara, ugu yaraan, astaynta iyo safaynta miinada lidka dadka. Xogahaas waa in ay ku jiraan cabbirada fuyuusyadaada, xaddiga qarxiye, xaddiga birta ah, sawiro midab leh ee xogaha kale ee sahalaya miino saarka.
6. Tallaabooyinka laga qaaday si dadweynaha loogu fidiyo digniin degdeg ah oo wax ku-ool ah ee la xidhiidha dhammaan goobaha miinadu ku jirto ama lagu tuhunsan yahay iyo tallaabooyinka laga qaaday sidii dadweynaha loogu fidiyo waxbarashada halista miinada iyo kaalmaynta dhibbanayaasha miinada ee ku xusan xeerkan.

Qoddobka 16aad

Soo ururinta miinada la haysto

1. Xafiisku marka Xeerkan dhaqangalo wuxuu baahinayaa wargelin qoraal ah oo dadweynaha loogu sheegayo in ay ku soo xareeyaan, kuna soo sheegaan miino kasta oo ay hayaan ama og yihiin muddo saddex bilood gudahood ah.
2. Wuxuu xafiisku ku war-gelinayaa cid kasta oo ka mid ah, kuwa lagu sheegay qoddobka 8aad ee xeerkan inay soo sheegaan macluumaad sugana ka soo bixiyaan miino kasta oo ay u haystaan hay'adahaasi ama dadkaasi sabab hawshooda la xidhiidha, soona dalbadaan ruqsadda ku sheegan Xeerkan.
3. Markay dhamaato muddada ku xusan faqrada 1aad ee qoddobkan, xafiisku wuxuu isagoo kaashanaya ciidamada booliska, sahaminayaa goob kasta oo miino taal ama cid kasta oo miino haysata.
4. Xafiisku marka uu helo macluumaadka ku xusan faqrada 3aad ee qoddobkan, wuxuu isagoo raacaya qodobada baadhista, xayiraada iyo qabashada qalabka dembiga ee ku xusan xeerka habka ciqaabta baadhis, xayiraad iyo qabasho ku samaynayaan miino kasta oo la haysto oo aanu xafiisku siin ruqsada xeerkan ku xusan ama aanu haysan ciidanka qalabka sida ee qaranku



QAYBTA 5AAD

WARARKA IYO XOGAHA

Qoddobka 17aad

Helitaanka Xogaha iyo Qoraallada

1. Xafiisku wuxuu awood u leeyahay, isaga oo ogeysiin qoraal ah ugu diraya inuu qof(cid) kasta ka dalbado inuu xafiiska soo siiyo macluumaad ama dhokumentiyoo uu ku cayimayo qoraalkiisa, haddii xafiisku rumaysan yahay in qofkaasi hayo xog ama qoraallo ku saabsan hawlaha Miinada.

Qoddobka 18aad

Ku dhaqmi waa ama bixin warar been ah

1. Qof kasta oo ka baaqsada isaga oo aan cudur-daar macquul ah u haysan inuu u hoggaansamo amar ogeysiin ah oo uu xafiisku siiyey ama isagoo ogsoon si kas ah xafiiska u siiya war been ah oo uu ku majarahabaabinayo, waxaa lagu ciqaabayaa dembiga-uu falkiisu waafaqsan yahay ee xeerka ciqaabta.



Qoddobka 19aad

Masuuliyad madani ah iyo magdhaw

1. Hay'adaha miinada wax ka qabtaa ma bixin karaan warbixin aan sugnayn, oo ku saabsan miinada.
2. Haddii hay'ad miinada wax ka qabataa soo saarto warbixin khaldan oo ah in goob laga dhammeeyay miinada oo aanay khatar miino lahayn goobtaasi, cid kasta oo markaa ka dib dhibaato miino ka soo gaadho, waxaa masuuliyaddeeda leh oo ka jawaabaysa khasaaraha miinadu keento hay'addii warbixinta soo saartay.
3. Hay'ad kasta oo kuwa miinada wax ka qabta ah oo goob miinaysan calaamad ku waaya ama xayndaab ama dayr dadku kaga baydho ama astaan uga digta ku samayn waaya, waxay masuul ka noqonaysaa waxyeellada miinadaasi gaysato madani ahaan.

Qoddobka 20 aad

Dhaqan- galka Xeerka

Xeerkani wuxuu dhaqan gelayaa marka Golaha Baarlamaanku ansixiyo (Golaha Wakiillada iyo Golaha Guurtidda) M/weynuhuna saxcexo.

ALLAA MAHAD LEH

Md. Cabdiraxmaan Maxamed C/laahi (Girra) Maxamed Xasan Kaahin (Keyse)
Guddoomiyaha Golaha Wakiillada J.S. Xoghayaha Guddiga G/Wakiillada

